

DIHA SA MGA SALIDA SA TV MABATI NATO NGA DUNAY MAG-AMPO NGA TAWGON NILA SI JESUS NGA PAPA JESUS. UG DIHA USAB SA MGA ESKWELAHAN MABATI NIMO NGA TUDLOAN SA MGA KATEKISTA ANG MGA BATA NGA TAWGON SI JESUS NGA PAPA JESUS. INSAKTO BA KINI NGA TERMINO NGA TAWGON SI JESUS NGA PAPA JESUS? UG SI MARIA MABATI USAB NATO NGA TAWGON SIYA SA TERMINO NGA MAMA MARY. INSAKTO BA USAB KINI NGA TERMINO NGA TAWGON SI MARIA NGA MAMA MARY? GUSTO LANG KA MASAYOD KON UNSAY TUBAG NIMO NIINI.

Kining imong mga pangutana maayo kaayo kini nga pangutana. Usa kini ka praktikal kaayong pangutana. Ug maayo gayod nga nangutana ka niining pangutanaha aron ako kining mahatagan ug panahon sa pagpasabot niining bahina. Kay daghan kaayo ang gigamit nga termino sa mga tawo nga wala gayod silay kalibotan kon kini insakto ba sumala sa Biblia. Sama pananglit sa imong giingon nga mga termino nga **Papa Jesus** ug **Mama Mary**. Ato kining usisahon sa Biblia kon insakto ba kini nga mga termino. Kay kasagaran natong mga tawo moingon man lang gud ta nga '**unsay namat-an maoy pakamatyan**' sa walay pagtuki nga insakto ba kini diha sa Biblia. Kini nagpasabot nga kasagaran sa mga tawo sirado na ang ilang hunahuna. Mao nga kasagaran sa mga tawo dili na sila magtuki kon nakabasi ba kini sa Kasulatan kondili kon unsa konoy namat-an sunodsunod nalang diretso sa walay pangutana. Ug mao kini ang hinungdan nga daghan sa mga tawo nga daw nagsawom sa lubog nga tubig. Mao nga kon dili ka magtuki nagmata kalag morning kay abi nimog insakto na, apan hilabihan diayng sayopa kon ibasi nimo sa Biblia. Mao nagdasig kanato ang Biblia nga samtang sayo pa, samtang may panahon pa, samtang wala pa ka mamatay, kinahanglan kitang mag-usisa, magtuki samtang dili pa ulahi ang tanan. Mao nga ang Biblia nagdasig gayod kanato nga sutaon ug sulayan nato ang ubang mga pagtulun-an kon maayo ba kini nga pagtulun-an o dili ba. Sama pananglit niining mosunod nga mga bersikulo sa Biblia.

1 Tesalonica 5:21-22(MBB) "Sutaa ninyo ang tanan; ampingi ang maayo (22) ug isalikway ang daotan."

1 Tesalonica 5:21-22(AB) "Hinonaa sulayi ninyo ang tanang butang; sagopa ninyo ang maayo (22) likayi ninyo ang tanang dagway sa kadaotan."

Ang bersikulo 21 nag-ingon "**Sutaa ninyo ang tanan; ampingi ang maayo**" nga sa hubad AB nag-ingon "**Hinonaa sulayi ninyo ang tanang butang; sagopa ninyo ang maayo**". Kini nagpasabot nga kinahanglan kang magtuki, kinahanglan kang mag-usisa. Kay unsaon man nimo pagkahibalo kon sakto ba o sayop ba ang pagtulun-an nga imong gisunod kon dili ka magtuki? Alang-alag moingon ka lang diretso nga sayop sila ug sakto ang imong namat-an nga wala pa gani ka makabati sa ubang pagtulun-an. Mao nga giingnan kita sa Biblia nga sutaa ninyo ang tanan. Kon maayo ampingi, apan kon daotan ug sukwahi sa gitudlo sa Biblia, nan, isalikway. Dili kay modiretso ra tag hukom nga sayop nga bisag wala pa kita makabati. Ang uban mahadlok sila nga maminaw ang ilang mga sakop sa laing pundok tungod kay nahadlok man sila nga unyag matandi nila ug mahibaloan nila nga sayop diay ang ilang pagtulun-an nga gisunod. Mao nga did-an nila ang ilang mga sakop sa pagpaminaw sa ubang grupo ug ingnon nila nga '**unsay namat-an maoy pakamatyan**'. Apan ang Biblia naghagit gayod hinoon kanato nga magtuki, mag-usisa ug mangita sa kamatuoran. Busa, kinahanglan kitang maminaw sad sa ubang pagtulun-an. Kon pagkabati nimo, imong nasuta nga kini dili sibo sa gitudlo sa Biblia, nan, ayaw nag paminaw kay nakabati naman ka nga ang ilang gitudlo sukwahi diay gayod sa Biblia. Ug sumala ni Jesus mismo nag-ingon siya nga kon mangita ka lang sa kamatuoran ug sa saktong pagtulun-an makaplagan gayod nimo kini. Kon mangita ka lang. Dili kay moingon lang ta diretso nga "**unsay namat-an maoy pakamatyan**". Sayop kaayo na nga prinsipyo kon Biblia ang imong basihan kay nagpasabot man kini nga dili kana magtuki. Mao nga ang pag-ingon nga "**unsay namat-an maoy pakamatyan**" sayop kaayo kini nga prinsipyo kon itandi nimo sa giingon ni Jesus nga ang mangita makakaplag. Busa, kinahanglan kang magtuki, ayaw pagkontento sa imong naandan kay daghan tag naandan o namat-an nga sukwahi kaayo sa gitudlo sa Biblia.

Ang BIBILIA may Tubag

Mateo 7:7-8(MBB) “Pangayo kamo, ug kamo hatagan; pangita kamo, ug kamo makakaplag; pagtuktok kamo, ug ablihan ang pultahan alang kaninyo. (8)Kay hatagan ang mangayo ug makakaplag ang mangita, ug ablihan ang pultahan alang kaniya nga nagtuktok.”

Ang bersikulo 7 nag-ingon “**Pangayo kamo, ug kamo hatagan; pangita kamo, ug kamo makakaplag; pagtuktok kamo, ug ablihan ang pultahan alang kaninyo.**” Kini nagpasabot lamang gayod kanato nga si Jesus nagtudlo nga kinahanglan kitang magtuki, mag-usisa, ug mangita sa kamatuoran. Pinaagi niini nga bersikulo, si Jesus nagpasalig kanato nga kon mangita ka lang gayod sa kamatuoran makaplagan gayod nimo kini. Kon mangita ka lang gayod. Apan kon moingon ka lang diretso nga “unsay namat-an maoy pakamatyan” kini nga prinsipyo sukwahi sa gitudlo sa Biblia. Kay nagpasabot man kini nga sirado na ang imong panghunahuna. Usa kini ka prinsipyo nga nakabasi sa garbo dili kini prinsipyo nga nakabasi sa Biblia. Mao nga lisod kaayo nimong dawaton ang kamatuoran kay sirado naman ang imong panghunahuna. Apan si Jesus nagtudlo nga pangitaa ug pangayoa sa Dios ang imong gikihanahanglan ug ang gusto nimong mahibaloan nga kamatuoran ug makaplagan gayod nimo kini. Busa, kon mangayo ka lang gayod sa Dios nga tultulan ka niya sa kamatuoran ug sa saktong pagtulun-an makaplagan gayod nimo kini. Apan kon dili ka mangita, kay sirado na ang imong hunahuna, bisag anaa pa kini sa imong atubangan dili gayod nimo kini makaplagan. Nan, unsaon man nimo pagkakaplag kondili ka magtuki? Unsaon man nimo pagkahibalo sa kamatuoran kon dili ka mag-usisa ug mangita? Usa kini ka hagit nga magsusi gayod kita. Mao nga miingon gayod si Jesus kanato nga ang mangita makakaplag, ang mangayo hatagan. Mao nga kining imong pangutana nga nag-ingon **‘insakto ba ang termino nga Papa Jesus ug Mama Mary’?** Maayo gayod kini nga nangutana ka aron aduna kay ideya unsay tubag sa Biblia niining imong mga pangutana. Nagpasabot gayod kini nga nagtuki ka. Mao nga miingon si apostol Pablo nga dili kita angay nga motoo diretso sa mga pagtulun-an nga atong namat-an nga gipatoo sa atong mga katigulangan kay dunay mga pagtulun-an nga gikabilinbilin sa atong mga katigulangan nga dili diay pagtulun-an nga iya ni Jesus kondili pagtulun-an diay nga gikan sa Yawa. Mao kini ang mabasa nato nga giingon ni apostol Pablo.

Colosas 2:8(ABMBB) “Busa matngoni nga dili kamo matunto sa lipatlipat sa tawhanong kaalam nga gikan sa mga pagtulun-an nga gikabilinbilin sa mga tawo, ug gikan sa mga espiritu nga naghari sa kalibotan apan dili diay gikan ni Cristo.”

Kini dayag kaayo nga nagsulti kanato nga kinahanglan nga magmatngon kita sa atong gihuptan nga pagtulun-an. Dili kay motoo ra ka diretso sa mga pagtulun-an nga gikabilinbilin sa mga tawo o sa mga katigulangan, dili nagpasabot kay maoy imong namat-an nga mao na nay insakto. Ang unang bahin sa bersikulo nag-ingon **“Busa matngoni nga dili kamo matunto sa lipatlipat sa tawhanong kaalam nga gikan sa mga pagtulun-an nga gikabilinbilin sa mga tawo”**. Kini nagpasabot nga kinahanglan nga magmatngon gayod kita sa atong gihuptan nga pagtulun-an nga atong namat-an aron dili kita mailad. Wala gayoy como kon magtuki ka. Mao nga gipahimangnoan ni apostol Pablo ang mga katawhan sa Colosas sa iyang sulat nga nag-ingon **“Busa matngoni nga dili kamo matunto sa lipatlipat sa tawhanong kaalam nga gikan sa mga pagtulun-an nga gikabilinbilin sa mga tawo, ug gikan sa mga espiritu nga naghari sa kalibotan apan dili diay gikan ni Cristo.”** Ang ikaduhang bahin sa maong bersikulo nag-ingon **“ug gikan sa mga espiritu nga naghari sa kalibotan apan dili diay gikan ni Cristo”** kini nagpasabot nga duna gayoy mga pagtulun-an nga atong napanonod nga abi natog gikan sa Ginoo apan gikan diay sa mga espiritu nga naghari sa kalibotan, nagpasabot, usa diay ka pagtulun-an nga gikan sa Yawa. Daghan kitag mga namat-ang pagtulun-an nga abi natog anaa sa Biblia, abi natog gikan ni Cristo apan inig basa nimo sa Biblia sukwahi diay mismo sa gitudlo ni Cristo. Mao nga wala gayoy como kon magtuki, wala gayoy como nga kita mismo mag-usisa. Ang pag-ingon nga **“apan dili diay gikan ni Cristo”** kini nagpasabot nga duna diay mga pagtulun-an nga atong napanonod sa atong mga katigulangan nga nagtoo kita nga iya ni Cristo apan dili diay. Nalipat ra diay ta. Mao nga aron dili ka malipatlipat kinahanglan kang magtuki. Mao nga miingon gayod

Ang BIBILIA may Tubag

ang bersikulo sa Colosas 2:8 “**Busa matngoni nga dili kamo matunto sa lipatlipat sa tawhanong kaalam nga gikan sa mga pagtulun-an nga gikabilinbilin sa mga tawo, ug gikan sa mga espiritu nga naghari sa kalibotan apan dili diay gikan ni Cristo.**” Kini dayag kaayo nga naghagit kanato nga kinahanglan dili kita motoo diretso sa mga pagtulun-an nga atong namat-an kondili kinahanglan nga usisahon sa nato pag-una kon tinuod ba gayod nga ang maong pagtulun-an sumala ba gayod sa Biblia. Unsa may daotan kon magtuki? Mao nga unsaon man nato pagkasayod sa maong pagtulun-an kon sayop ba o dili kon dili kita magtuki. Mao nga gihagit kita nga usisahaon gayod nato ang pulong sa Dios. Kay ang pulong sa Dios mao may sumbanan sa atong Cristohanong pagtoo.

Isaias 34:16(MBB) “Susiha ug basaha sa libro sa Ginoo; walay usa kanila nga makulang o mawad-an sa iyang pares. Kay pagbuot kini sa Ginoo ug siya mismo maoy magtigom kanila.” Ang pag-ingon '**Susiha ug basaha sa libro sa Ginoo**', ang **libro sa Ginoo**” kini nagpasabot sa **Kasulatan** nga karon atong gitawag **Biblia**. Ang pag-ingon '**Walay usa kanila nga makulang**' kini nagpasabot nga '**Ang tanan nga gisulti niini matuod gayod, walay kulang ug dili gayod mosipyat**. Mao nga kini nagpasabot nga ang tanan nimong gikinahanglan mahitungod unsaon sa pagkinabuhi nga maoy gusto sa Dios naay tubag ang pulong sa Dios. Sa tanan nimong mga problema, mga kalibog, mga pangutana naay tubag ang pulong sa Dios nga mabasa sa Biblia. Kon susihon lang gayod nimo ang Biblia naay tubag ang Biblia sa tanan natong mga pangutana. Mao kini ang usa sa mga kahibulongan sa Biblia. Mao nga importante kaayo nga masayod gayod kita sa mga pulong sa Dios nga anaa sa Biblia. Busa kinahanglan kitang magsusi, magtuki aron dili kita mailad ug aron dili kita matonto sa mga sayop nga mga pagtulun-an nga atong namat-an. Kay ang ilhanan nga ang maong tawo nagsulti sa matuod kon siya nagsulti sumala gayod sa pulong sa Dios.

Juan 3:34(MBB) “Kay ang sinugo sa Dios nagsulti sa mga pulong sa Dios, ug sa walay sukod ang Dios naghatag kaniya sa iyang Espiritu.”

Sumala ni Jesus nga ang sinugo sa Dios nagsulti gayod sa mga pulong sa Dios. Mao nga magtuki ka, maminaw ka kon ang iyang gitudlo subay ba gayod sa Biblia. Dili kay pulos lang pagdepensa sa namat-ang pagtulun-an. Kay kon magsigi kalag depensa sa imong namat-ang pagtulun-an gansi gayod ka dana sa kataposan kay ang angayng depensa mao ang gisulti ug ang gitudlo sa Biblia, bahalag kinsay maigo kay mao nay kamatouran. Mao nay trabaho sa mga alagad sa Dios, tigdepensa sa mga pulong sa Dios. Kon motubag Biblia ang patubaga. Ug kon pananglitan mangutana ka niya, susiha kon ang iyang mga tubag nakabasi ba o mabasa ba gayod sa Biblia. Kay ang Biblia o ang pulong sa Dios mao man kini ang basihanan kon mahitungod sa atong pagtoong Cristiyano. Sama pananglit ni apostol Pablo, si apostol Pablo nagtubo siya sa tinuohan sa mga Judio nga Judaismo, nga maoy tinuohan sa iyang mga katigulangan nga iyang gisunod sa dugay na kaayong panahon. Apan sa pag-abot sa panahon nga nasayran niya ang saktong pagtulun-an mahitungod ni Cristo mibiya siya niining pagtulun-ana.

Galacia 1:13-14(ABMBB) “Gisuginlan na kamo sa akong pagkinabuhi sa nagsunod pa ako nga mainiton sa tinuohan sa mga Judio. Gilutos ko sa walay kukaluoy ang iglesia sa Dios, ug gihimo ko ang tanan aron paglaglag niini. (14)Labaw ako kaminumanon sa tinuohan sa mga Judio kay sa kadaghanan sa mga Judio nga akong mga talirongan. Labi pa akong mainiton sa akong pagsunod sa mga gikabilinbiling mga pagtulun-an sa atong mga katigulangan.”

Kini nagpasabot lamang kanato nga basi sa kasinatian ni apostol Pablo, ang iyang namat-an nga pagtulun-an nga iyang gisunod gikan sa iyang mga katigulangan nakaplagan gayod niya nga dili diay insakto. Mao nga iyang gipalabi ang pulong sa Dios kay sa iyang namat-ang pagtulun-an. Ang unang bahin sa bersikulo 13 nag-ingon “**Gisuginlan na kamo sa akong pagkinabuhi sa nagsunod pa ako nga mainiton sa tinuohan sa mga Judio.**” Kini nagpasabot nga si apostol Pablo membro siya sa tinuohan sa mga Judio nga mao ang Judaismo. Ang tinuohan sa iyang mga katigulangan. Ug mainiton kaayo siya sa pagsunod sa maong tinuohan. Mao nga gilutos

Ang BIBILIA may Tubag

niya sa walay kukaluoy ang iglesia sa Dios, kay kining iglesia sa Dios nagtudlo man nga lahi sa gitudlo sa tinuohan sa iyang mga katigulangan. Ug kining iglesia sa Dios mao kini ang iglesia diin nahisakop ang mga apostoles ni Cristo ug ang mga magtotoo ni Cristo. Mao nga miingon gayod ang bersikulo 13 **“Gisuginlan na kamo sa akong pagkinabuhi sa nagsunod pa ako nga mainiton sa tinuohan sa mga Judio. Gilutos ko sa walay kukaluoy ang iglesia sa Dios, ug gihimo ko ang tanan aron paglaglag niini.”** Kini nagpasabot lamang gayod kanato nga si apostol Pablo dili membro sa iglesia sa Dios kaniadto kondili manglulutos siya sa iglesia sa Dios. Ug tungod kay ang iglesia sa Dios wala naman magsunod sa mga pagtulun-an nga gikabilinbilin sa mga katigulangan ug ang ilang gisunod mao naman ang pagtulun-an ni Cristo mao kini ang hinungdan nga gilutos ni Pablo pag-ayo kining iglesia sa Dios tungod kay hilabihan ang iyang pagsunod sa mga gikabilinbiling mga pagtulun-an sa iyang mga katigulangan. Mao kini ang mabasa nimo nga gisulti ni Pablo diha sa bersikulo 14 **“Labaw ako kamatinumanon sa tinuohan sa mga Judio kay sa kadaghanan sa mga Judio nga akong mga talirongan. Labi pa akong mainiton sa akong pagsunod sa mga gikabilinbiling mga pagtulun-an sa atong mga katigulangan.”** Mao kini ang hinungdan nganong gilutos niya pag-ayo ang iglesia sa Dios, kay hilabihan siya ka deboto sa tinuohan nga gikabilinbilin sa iyang mga katigulangan. Hilabihan ang iyang pagsunod sa iyang namat-ang mga pagtulun-an. Sama pananglit niining imong mga pangutana nga naandan sa mga tawo nga tawgon si Jesus nga papa Jesus ug si Maria tawgon pod ug Mama Mary. Insakto ba kini?

Sa Biblia dili ka makabasa nga nagtudlo si Jesus nga tawgon nimo siyag Papa Jesus. Dili sad ka makabasa sa Biblia nga nagtudlo ang mga apostoles ug ang mga tinun-an ni Jesus nga tawgon si Jesus nga Papa Jesus. Wala kay mabasa sa Biblia nga dunay tawo nga nag-ampo nga migamit sa termino nga papa Jesus. Wala sad kay mabasa sa Biblia nga dunay tawo nga misangpit ug mitawag kang Jesus nga Papa Jesus. Kon tawgon nimo si Jesus nga Papa Jesus sukwahi kini sa gitudlo ni Jesus mismo. Kay si Jesus mismo maoy nagtudlo kanato nga adunay usa lamang ka Amahan nga atua sa langit.

Mateo 23:9(ABMBB) “Ug dinhi sa kalibotan ayaw tawga si bisan kinsa nga ‘Amahan’ kay usa ra ang inyong Amahan nga atua sa langit.”

Mateo 23:9(AB) “Ug kinahanglan walay bisan kinsang tawo dinhi sa yuta nga inyong pagatawgon nga inyong amahan, kay kamo adunay usa lamang ka Amahan nga anaa sa langit.” Atong hinumduman nga si Jesus mismo maoy nagsutli niini sa dinhi pa siya sa kalibotan. Matud ni Jesus mismo **“dinhi sa kalibotan ayaw tawga si bisan kinsa nga ‘Amahan’ o Papa, nga sa iningles pa Father kay usa ra ang inyong Amahan nga atua sa langit.”** Kini klaro ug dayag kaayo nga nagsulti si Jesus kanato nga usa ra ang angay natong tawgon nga Amahan o Papa o Father sa iningles pa, ug mao kini ang Dios Amahan, ang Amahan ni Jesus nga atua sa langit. Matud ni Jesus mismo dili ka magtawag ug father o papa ni bisan kinsa dinhi kalibotan kon mahitungod na sa pagtoo. Mao nga dili ka makabasa sa Biblia bisan usa nalang ka bersikulo nga dunay mga alagad sa Dios nga nagpatawag ug father o amahan. Ang mga apostoles mismo wala sila magtawgag ug ‘father’ nga sa bisaya pa ‘amahan’ kay sumala ni Jesus mismo nga dinhi kalibotan ayaw tawga si bisan kinsa nga amahan o father basta mahitungod na sa pagtoo kay usa ra ang atong Amahan nga atua sa langit. Si apostol Pedro dili ka makabasa nga nagpatawag siyag father o papa. Mao nga kon dunay tawo sa kalibotan nga nagpatawag ug papa sama sa Santo Papa ug sa mga pari ‘father, supak kaayo na sa gitudlo ni Cristo mismo. Busa, kon may relihiyosong pangulo nga nagpatawag ug father o papa dayag nalang kaayo nga misupak siya sa gitudlo ni Jesus, nan, dili gayod siya tinuod nga alagad ni Jesus. Kay si Jesus mismo klaro kaayo nga nagtudlo sa iyang mga tinun-an ug nagsulti kanato sumala sa Mateo 23:9 nga nag-ingon **“Ug dinhi sa kalibotan ayaw tawga si bisan kinsa nga ‘Amahan’ kay usa ra ang inyong Amahan nga atua sa langit”**. Si Cristo mao ang Anak sa Dios. Dili siya ang Amahan. Nan, kon tawgon nimo si Jesus nga Papa Jesus, mogawas duha nay Amahan busa mo-contradik kini sa gisulti mismo ni Jesus nga usa ra ang atong Amahan nga atua sa langit. Kon tawgon nimo si Jesus nga Amahan o papa, nan unsa namay imong itawag sa Dios Amahan mahug na hinoon nga siya ang Lolo. Si Jesus mao ang Anak sa Amahan, dili siya ang Amahan. Mao nga dili siya angay nimong tawgon nga papa Jesus kay usa ra ang atong Amahan o papa, nga mao ang Dios Amahan. Si Jesus mao ang Anak sa Dios Amahan, dili siya ang Amahan. Busa ayaw siya tawgag Papa Jesus kay dili man siya ang Amahan. Tawga hinoon siya nga Lord Jesus, dili kay Papa Jesus kay sukwahi ug supak na sa gitudlo ni Jesus mismo.

Ang BIBILIA may Tubag

2 Juan 1:3(MBB) “Ang Dios nga Amahan ug ang iyang Anak nga si Jesu-Cristo maghatag kanatog grasya, kaluoy ug kalinaw diha sa kamatuoran ug sa gugma.”

2 Juan 1:3(AB) “Ang grasya, kalooy, ug kalinaw gikan sa Dios nga Amahan ug gikan kang Jesu-Cristo nga Anak sa Amahan, magauban kanato sa pagkatinuod ug sa gugma.”

Kini dayag kaayo nga nagpasabot kanato nga sumala ni apostol Juan si Jesus dili siya ang Amahan kon dili siya ang Anak sa Amahan. Si Cristo mao ang Anak sa Dios. Dili siya ang Amahan. Nan, kon tawgon nimo si Jesus nga Papa Jesus, mogawas nga na hinoon nga mora nag Lolo ang Dios Amahan. Mao nga ang usa ka sayop nga pagtulun-an mo-anak usab kini ug laing sayop nga pagtulun-an. Kay wala man magtudlo ang Biblia nga tawgon si Jesus nga Papa Jesus, nan, ayaw gamita ang maong termino. Tawga hinoon siyag Lord Jesus kay mabasa na nimo sa Biblia. Unsay nasulat sa Biblia maoy sunda dili nang naandan o ang gitudlo sa mga katigulangan kay ang Biblia maoy atong sumbanan sa atong pagkinabuhi isip Cristiyanos. Si Jesus mao ang Anak sa Dios, siya ang Anak sa Amahan, busa, dili siya ang Amahan, busa ayaw siya tawgag Papa Jesus. Mao nga sa mga sulat ni apostol Pablo imong mabasa nga kanunay siya nagsulti nga ang Dios maoy atong Amahan ug si Jesu-Cristo mao ang atong Ginoo.

Roma 1:7(ABMBB) “Busa gisulatan ko kamong tanan nga taga-Roma nga gihigugma ug gitawag sa Dios aron mahimong iyang katawhan: Hatagan unta kamog grasya ug kalinaw sa Dios nga atong Amahan ug sa Ginoong Jesu-Cristo.”

Ang kataposang bahin sa bersikulo nag-ingon “Hatagan unta kamog grasya ug kalinaw sa Dios nga atong Amahan ug sa Ginoong Jesu-Cristo.” Kini nagpasabot nga ang gitawag ni apostol Pablo nga atong Papa o Amahan mao ang Dios Amahan ug Jesus mao ang atong Ginoo. Basta mahitungod na sa pagtoo usa ray tawga nga papa o Amahan kini mao ang Dios nga Amahan. Pwede ka motawag ug papa sa usa ka tawo kon kini mao ang imong tawhanong amahan pero kon mahitungod na sa pagtoo sumala ni Jesus dili ka magtawag ni bisan kinsa ug amahan o father dinhi sa kalibotan kon mahitungod na sa pagtoo kay usa ra ang atong Amahan nga atua sa langit.

Juan 20:17(ABMBB) “Unya giingnan siya ni Jesus, ‘Ayaw akog hikapa kay wala pa ako makabalik sa Amahan. Adtoa hinuon ang akong kaigsoonan ug suginli sila nga moadto ako sa akong Amahan ug inyong Amahan, sa akong Dios ug inyong Dios.’”

Kini nga bersikulo nagsulti kanato nga si Jesus moadto sa iyang Amahan nga ato usab nga Amahan. Ang kataposang bahin sa maong bersikulo nag-ingon “moadto ako sa akong Amahan ug inyong Amahan”. Wala moingon ang bersikulo nga “moadto ako sa akong Amahan apan dili inyong Amahan kay ako ang inyong Amahan”. Wala moingon si Jesus niana kondili miingon gayod hinoon siya nga “akong Amahan ug inyong Amahan”. Kini dayag kaayo nga nagpasabot kanato nga ang Amahan ni Jesus ug ang atong Amahan mao ra. Mao kini ang Dios nga Amahan. Mao nga wala gayod kay mabasa sa Biblia nga si Jesus nagpatawag sa mga kabataan ug sa iyang mga tinun-an nga papa Jesus. Siya mismo miingon nga ang iyang Amahan mao usab ang atong Amahan. Nagpasabot, si Jesus dili ang Amahan, busa dili siya angay nimong tawgog papa Jesus, kay dili man siya ang Amahan. Mao nga kon tawgon nimo ni Jesus nga papa Jesus kontra mong Jesus kay siya mismo miangkon nga ang atong Amahan o papa mao ang Dios Amahan, ang Amahan ni Jesus. Lain pang bahin sa Biblia nga nagsulti kanato nga adunay usa lamang ka Amahan.

Efeso 4:6(ABMBB) “May usa lamang ka Dios ug Amahan sa tanang mga tawo. Siya mao ang labaw sa tanan ug nagbuhat pinaagi sa tanan ug anaa sa tanan.”

Kini nagpasabot lamang gayod kanato nga adunay usa lamang ka Amahan nga Amahan sa tanang mga tawo ug kini mao ang Dios Amahan, ang Amahan ni Ginoong Jesus. Busa dili ka angay motawag kaniya nga papa Jesus. Mao nga sa dihang gitudloan ni Jesus ang iyang mga tinun-an sa pag-ampo, iyang giingnan nga kon mag-ampo sila i-address nila sa Amahan.

Mateo 6:9(ABMBB) “Busa, ingna hinuon niini pag-ampo: Amahan namo nga anaa sa langit balaanon ang imong ngalan...” Kini nagpasabot nga nagtudlo gayod si Jesus ngadto sa iyang mga tinun-an nga kon mag-ampo sila i-address ngadto sa iyang Amahan ug pangayoan pinaagi sa iyang ngalan. Wala kay mabasa sa Biblia nga kon mag-ampo ka i-adres nimo sa pag-ingon nga papa Jesus. Dili gayod na nimo mabasa sa Biblia.

Ang BIBILIA may Tubag

Ug ang ikaduhang bahin sa imong pangutana nag-ingon **“UG SI MARIA MABATI USAB NATO NGA TAWGON SIYA SA TERMINO NGA MAMA MARY. INSAKTO BA USAB KINI NGA TERMINO NGA TAWGON SI MARIA NGA MAMA MARY?”**

Ang termino nga Mama Mary dili sad na nimo mabasa sa Biblia bisan usa nalang ka bersikulo. Sa Biblia wala kay mabasa nga dunay tawo nga mitawag kang Maria nga Mama Mary kay bisan si Jesus mismo wala man gani motawag kang Maria nga Mama Mary nga iya tong tawhanong inahan, nan, unsa pa ka ha nato. Ang termino nga Mama Mary migawas lang kini tungod kay nagtudlo man ang Romano Katolikong Simbahan niadtong 431 A.D didto sa Council of Ephesus sa termino nga Mother of God nga si Maria kono inahan kono sa Dios kon Mother of God. Pero ang termino nga mother of God dili kini nimo mabasa nga termino sa Biblia. Gitawag lang si Maria nga inahan ni Jesus sumala sa Juan 2:1 ug inahan sa Ginoo sumala sa Lucas 1:43. Pero ang termino nga mother of God dili na nimo mabasa sa Biblia. Dili ka makabasa sa Biblia nga ang mga apostoles ug ubang mga tinun-an ni Jesus nga mitawag kang Maria nga Mama Mary. Kay kon maghisgut kita sa pagkadios ni Jesus labot si Maria. Atong hinumdnuman nga sa wala pa ipanamkon si Jesus sa tagoangkan ni Maria si Jesus diha nang daan. Naglungtad na siya, kauban na siya sa Amahan sukad pa sa sinugdanan.

Juan 1:1, 14(MBB) “Sa wala pay nabuhat bisan unsa, ang Pulong diha na. Ang Pulong uban sa Dios ug ang Pulong Dios... (14)Ang Pulong nahimong tawo ug mipuyo uban kanato. Nakita namo ang iyang himaya nga puno sa grasya ug sa kamatuoran. Kini ang himaya nga iyang nadawat ingon nga bugtong Anak sa Amahan.” Kini nagpasabot nga diha na si Cristo sa wala pa siya ipanamkon sa Espiritu Santo sa tagoangkan ni Maria. Kauban na siya sa Dios Amahan, wala pa lang siya magpakatawo.

Colosas 1:15, 17(MBB) “Si Cristo mao ang makita nga larawan sa dili makita nga Dios. Siya ang panganayng Anak ug labaw siya sa tanang binuhat... (17)Diha na siya sa wala pa buhata ang tanang butang, ug diha kaniya ang tanan nahimutang sa ilang hustong dapit.”

Kini klaro kaayo nga nagsulti kanato nga diha na si Jesus sa wala pay nabuhat bisan unsa. Nagpasabot, wala pa si Mary diha na si Jesus naglungtad na, wala pa lang siya magpakatawo. Busa, dili gayod mahimong inahan si Maria sa pagkaDios ni Jesus. Mao nga ang termino nga Mother of God dili gayod na nimo mabasa sa Biblia. Mao nga ang termino nga Mama Mary dili gayod na nimo mabasa sa Biblia bisan usa nalang ka bersikulo. Sa Biblia wala kay mabasa nga dunay tawo nga mitawag kang Maria nga Mama Mary kay bisan si Jesus mismo wala man gani motawag kang Maria nga Mama Mary nga iya tong tawhanong inahan, nan, unsa pa ka ha nato. Samot na nga dili ka makabasa sa Biblia nga dunay nag-ampo ngadto kang Maria. Ang termino nga Mama Mary migawas lang kini tungod kay nagtudlo man ang Romano Katolikong Simbahan niadtong 431 A.D didto sa Council of Ephesus sa termino nga Mother of God nga si Maria kono inahan kono sa Dios. Pero ang termino nga mother of God dili kini nimo mabasa nga termino sa Biblia. Dili ka makabasa sa Biblia nga ang mga apostoles ug ubang mga tinun-an ni Jesus nga mitawag kang Maria nga Mama Mary. Atong hinumdnuman nga sa wala pa ipanamkon si Jesus sa tagoangkan ni Maria si Jesus diha nang daan. Naglungtad na siya, kauban na siya sa Amahan sukad pa sa sinugdanan.

Busa ang mga termino nga Papa Jesus ug Mamay Mary pulos na dili mabasa sa Biblia. Kon tawgon si Jesus nga Papa Jesus ug si Maria, Mama Mary, nan, morag mogawas nga daw magtiayon na hinoon sila. Mogawas na hinoon nga mora nag magtiayon si Jesus ug si Maria, kay Papa Jesus ug Mama Mary man. Nan, kon si Jesus tawgon nga Papa ug si Maria, Mama, unsa namay itawag nato kang ni Jose, unsa man Lolo Jose? Mogawas na hinoon nga si Jose morag ilang Lolo. Mao nga wala gayoy komo kon ang atong mga termino nga gamiton nakasubay sa Biblia. Busa, kon Biblia ang atong basihan, ang paggamit sa termino nga Papa Jesus ug Mama Mary pulos na dili mabasa sa Biblia.